

## Script of Morning Gojri News Bulletin 20 September 2024 at 1015Hrs

ما رنینگ گو جری نیوز بلیٹن مورخہ 20 ستمبر 2024

\*\*\*\*\*

یوہ آکاشوانی جموں بے عبدالرحمن تین خبر سُنو۔

### Election 2nd Phase

جموں کشمیر مانہ اسمبلی انتخابات غا دوجا تے تیجا مرحلہ غا تناظر مانہ جس واسطے 25 ستمبر اور پہلی اکتوبر نانہ ووٹ کھلیا جائیں گا۔ مرکزی وزیر داخلہ امت شاہ تے وزیر دفاع راجناتھ سنگھ اک وری فر پارٹی امیدواران گا حق مانہ حمایت حاصل کرن غا مقصد سنگ 21 ستمبر نانہ جموں صوبہ غو دورو کر رہیا ہیں۔ آکاشوانی جموں غا نامہ نگار نے دسیو ہے جے کا نگریس لیڈر رائل گا ندھی غو وی 23 ستمبر نانہ ضلع پو نچھ غا سرنکوٹ سب ڈویژن غو دورو کرن غو پروگرام ہے۔ مرکزی وزیر داخلہ امت شاہ اج شام جموں پچیں گا تے ان غو اکھنور، نوشہراہ، راجوری تھنہ منڈی، مینڈھر تے سرنکوٹ مانہ عوامی ریلیاں سنگ خطاب کرن غو شڈیول ہے۔ اسے طرح وزیر دفاع راجناتھ سنگھ سندر بنی، آر ایس پورہ، اڈھم پور تے پونچھ مانہ عوامی ریلیاں سنگ خطاب کریں گا۔ مرکزی وزیر جے پی نڈا جموں مشرق مانہ اک روڈ شو منعقد کرینگا۔ تے دوجی طرف کا نگریس لیڈر و پارٹی غا سٹار مہم باز رائل گا ندھی 23 ستمبر نانہ جموں پچیں گا تے وے سرنکوٹ علاقہ مانہ لوکاں سنگ خطاب کریں گا۔ سابقہ ریاست مانہ ان اہم انتخابات غا تناظرت مانہ بی جے پی تے کا نگریس دوہاں گا لیڈر جموں کشمیر مانہ واضع ریلی کڈ رہیا ہیں۔ وزیر اعظم جناب نریندر مودی نے کل سرینگر تے کٹڑہ غو دورو لایو تے انہاں نے اس موقع ور لوکاں سنگ خطاب کرتاں وان ات وسیع تر ترقی تے خاندانی سیا ست کا خاتمہ غو وعدو کیو۔ 3 مرحلاں مانہ کروایا جا رہیا اسمبلی چناؤ غو پہلو مرحلو 18 ستمبر نانہ منعقد ہوو۔ جس غے تحت یوٹی غا 7 ضلعان مانہ پھیلیا واہ 24 اسمبلی حلقان مانہ مجموعی طور ریکارڈ زبردست 61 فیصد ووٹینگ ہوئی ہے۔ دوجا 2 مرحلاں غے تحت 25 ستمبر تے پہلی اکتوبر نانہ ووٹ کھلیا جائیں گا۔ اور ووٹان غی گنتی 8 اکتوبر نانہ کی جائے گی۔

\*\*\*\*\*

### PM Modi & Congress

وزیر اعظم و سینئر بی جے پی لیڈر نریندر مودی نے کل سرینگر مانہ اک عوامی ریلی سنگ خطاب کیو ہے۔ عوامی ریلی سنگ خطاب کرتاں وان جناب مودی نے لوکاں نانہ اپیل کی ہے جے 25 ستمبر نانہ منعقد ہون آلا اسمبلی چناواں گا دوجا مرحلہ غے دوران ریکارڈ اچھی تعداد مانہ ووٹ کھلیں۔ انہاں نے مزید کہیو جے پہلا مرحلہ غے تحت کل ہوئی ووٹینگ غے دوران جموں کشمیر غا لوکاں نے اک نویں تاریخ رچتاں وان بڑی تعداد مانہ چناؤ مانہ شامل ہوتاں وان اپنا حق رائے دہندگی و حق شہریت غو استعمال کیو ہے۔ انہاں نے کہیو کل پہلی بار اس گل غو مشاہدو کیو گیو ہے جے پہلی بار جموں کشمیر مانہ دہشت گردی غا سایا تین بغیر ووٹینگ منعقد ہوئی۔ سینئر کانگریس لیڈر سچن پانٹ نے کل کہیو ہے جے جموں کشمیر مانہ ریاست غو درجو واپس بحال کرن آلو معاملو ات غا لوکاں غا وقار عزت نفس تے خودداری سنگ جڑیو وہ ہے۔

\*\*\*\*\*

## SVEEP Awareness Jammu

ضلع سماجی بھلائی بہتری محکمہ غی طرفوں کل لو نیز برلے سکول مانہہ نا بینہ لڑکیاں واسطے اک کھیڈ تقریب غو احتتام کیو گیو۔ جس غو مقصد معزور طالب علماں مانہہ ووٹر بیداری پھیلانو بے تے جموں کشمیر اسمبلی انتخابات 2024 مانہہ اُنہاں ناہہ اپنا ووٹ غا حق غا استعمال با رے اُنہاں غی حوصلہ افزائی کی گئی۔ اسکولی طالب علماں ، سرکاری عہدیداراں تے سول سوسائٹی غا ممبران سمیت کوئی 3 سو افراد نے اس پروگرام مانہہ شرکت کی۔ اس موقعہ ور نوجوان ووٹراں ناہہ سکشم ایپ تے پولیننگ مرکزوں ور چناؤ کمیشن غی طرفوں معزور افراد واسطے دستیاب بہت ساری سہولیات جس طرح کہ ریمپ، معزوراں واسطے ویل چنیر وغیرہ بارے اُجاگر کیو گیو۔ اس تقریب غے ذریعے جموں ضلع غا تمام معزور ووٹراں ناہہ کہیو گیو بے جے وے اسمبلی چناؤ 2024 غا تیجا مرحلہ غے تحت پہلی اکتوبر ناہہ نزدیکی پولیننگ مرکز ور جا غے اپنو قیمتی ووٹ کہلیں تے انتخابی عمل مانہہ شمولیت کریں۔

\*\*\*\*\*

## SVEEP Rajouri

راجوری مانہہ کل اک بڑی غبارہ ریلی گو انعقاد کر غے حق رائے دہندگی غی اہمیت ناہہ اُجاگر کیو گیو۔ جس مانہہ راجوری قصبہ غا 11 سرکاری ونجی اسکولاں گا تقریباً 9 سو طالب علماں تے عملہ غی پُر جوش شراکت ناہہ دیکھیو گیو۔ اس ریلی غو بنیادی مقصد 25 ستمبر ناہہ جموں کشمیر قانون ساز اسمبلی غا چناؤ غا دوجا ر مڑلہ غے تحت بون آلی ووٹینگ غے متعلق بیداری پھیلانو تھو۔ ریلی غے دوران عوام ور زور دتو گیو جے وے اپنی مرضی غو امید وار چُنن با رے بڑی تعداد مانہہ ووٹ کہلیں۔ اس تقریب غے دوران اسکولی عملو، طالب علماں غے ہمراہ تھو تے یاہ ریلی جنرل بس اڈاہ ور اختتام پزیر ہوئی۔ جمہوری عمل مانہہ شرکت با رے بیداری پھیلان غا مقصد سنگ یاہ تقریب ضلع سویپ سیل راجوری غی اک نمایاں کوشش بے۔

\*\*\*\*\*

## SMVD Consituency

جموں کشمیر مانہہ چل رپیا اسمبلی انتخابات غا دوجا مرحلہ غے تحت اس مہینہ غی 25 تا ریخ ناہہ پولیننگ وے گی۔ اس مرحلہ غے تحت جموں صوبہ غا 3 ضلعان مانہہ پھیلیا واہ 11 اسمبلی حلقاں سمیت 26 سیٹیاں ور ووٹ کہلیا جائیں گا۔ اس مہینہ غی 25 تا ریخ ناہہ ہی ماتا ویشنو دیوی اسمبلی حلقہ مانہہ وی ووٹ کہلیا جائیں گا۔ جہیزو حلقو حد بندی تیں بعد وجود مانہہ آیو بے۔ تے پہلاں یوہ علاقہ ریاسی اسمبلی حلقہ غو حصو تھو۔ اس حلقہ مانہہ 56 ہزار 5 سو 6 رائے دہندگان ہیں۔ جس مانہہ 29 ہزار 6 سو 61 مرد تے 26 ہزار 8 سو 46 خواتین ووٹر ہیں۔ حلقہ مانہہ 90 پولیننگ مرکز قائم کیا گیا واہ ہیں۔ جن مانہہ 1 گلابی، 2 سبز تے 2 معزور ان با رے پولیننگ سٹیشن وی ہیں۔ حتمی طور ات چناوی میدان مانہہ 7 امید وار ہیں۔ ات نیشنل کانفرنس کانگریس اتھاد غا سانجھا امید وار ہیں بھوپیندر سنگھ، بی جے پی غا امید وار ہیں بلدیوراج شرما، پی ڈی پی غا امید وار ہیں پرتاپ کرشن شرما اور اتوں آزاد امید وار ہیں جُگل کشور، بنسی لال، راج کمار تے شام سنگھ، ات پُر امن چناؤ کران گا مقصد سنگ تمام تر حفاظتی و دوجا انتظامات کر رکھیا گیا واہ ہیں۔

\*\*\*\*\*

## Chief Secretary

چیف سیکریٹری اتل ڈلو نے کل محکمہ جنگلات غا افسران غی اک میٹنگ غی صدارت کرتاں واں بنجر علاقان مانہہ شجرکاری تے دوجی رکھا رکھاؤ کوششاں غو جائزو لیو ہے۔ چیف سیکریٹری موصوف نے اس سلسلہ مانہہ بہتر منصویاں بارے زور دتو۔ چیف سیکریٹری موصوف نے شجرکاری مہم بارے کہیو، اس موقع ور دسیو گیو جے ”ایک پیڑ ماں کے نام“ مہم غے تحت محکمہ جنگلات غی طرفوں تقریباً 38 لکھ بوٹا لان غو نشانو حاصل کیو گیو ہے۔ تے کیمپا و کپیکس غے تحت وی 28 لکھ بوٹا لایا گیا ہیں۔

\*\*\*\*\*

## Home Votig

ضلع راجوری غا تمام اسمبلی حلقاں مانہہ کل قانون ساز اسمبلی 2024 بارے کھرتیں ووٹینگ غو پہلو دن منعقد ہوؤ۔ جس دوران ووٹراں مانہہ کافی جوش دیکھیو گیو۔

\*\*\*\*\*